

王靖汶 (14675951)
林瀚超 (14676087)

《遷沈》

龍卓驥為人市儈貪婪，依著自訂的四大法則行事，盡貪小便宜。一次偶然於天台遇上布販布永存，布永存向他講述半生當布販事跡，龍卻輕蔑之。

適逢暗戀對象Mary回國。兩人識於大學，Mary其後到外國修讀攝影七年，一直向著自身的理想前進，而龍曾在大學時修設計，卻停滯不前，龍不想Mary失望，便向她訛稱他已成為設計師。及後Mary想過兩天拜訪龍的家，豈料碰著社工李阮阮家訪，幸好Mary還未到，原來龍一直詐騙綜援，同屋好友黃天生、林家富協助隱瞞，以免李阮阮發現詐騙綜援的線索，最終暫成功瞞天過海，李阮阮離去。此時Mary正好到達，Mary對龍詐騙之事仍一無所知，龍鬆一口氣，Mary相約龍作嚮導，帶她到香港四周拍攝影集。

他們先到工廈參觀展覽，碰巧撞到李阮阮，並惹她懷疑。龍膽戰心驚，於是又去到下一個目的地：深水涉布販市場，又遇上布販布永存，Mary對布永存進行訪問，得悉市場原來快要被清拆，惟布永存依然樂於天命。

時光飛逝，Mary很快便完成拍攝工作，離開香港，在上機前，Mary對龍對了一番肺腑之言，覺得龍沒了以往的一團火，龍聽後感失落。而另一方面，李阮阮一直追查龍，龍感壓力。在雙重壓迫下，龍陷入谷底，好友黃天生與林家富安慰他，並於言語間透露龍之所以變得墮落，是因為初出茅廬時遇上失意，於是一蹶不振，放棄設計，繼而騙綜援，龍在大學時是一個很有才能的設計學生，兩人感惋惜，並想法子幫助他。

在龍失落間，他又遇上布永存，布永存叫他到布檔幫助他。龍在布檔工作期間重拾對設計的熱誠，慢慢振作起來。於是決定放棄騙綜援，並鋪路重新當設計師。豈料他在家的樓下碰到警察上門辦公，他以為騙綜援之事已暴露，萬念俱灰之際，方發覺只是一場虛驚，警察只是路過到旁邊的單位辦事，這使龍更加大決心振作。

兩年過去，龍重新振作，並開了自己的設計品牌。他在路上遇上李阮阮，原來當年李阮阮仍一直相信龍，沒展開對龍的大型調查，並對龍今時今日的近況感到開心。而龍應邀到Mary舉辦的影展，兩人亦冰釋前嫌。但是，要清拆的還要清拆，布販市場最後也要被推土機夷平，最後龍與布一同見證布販市場的消失。

人物介紹

龍卓驥：	內在衝突： 外來衝突： 目標：	曾有理想，卻迷失自我，繼而變了個人，去詐騙綜援 曾熱衷於設計，因設計事業失意而放棄設計 詐騙綜援，卻遭社工李阮阮懷疑 暗戀對象 Mary 對他失去信心 尋找真我，重拾理想
Mary：	內在衝突： 外來衝突： 目標：	離開八年，對香港人生路不熟 認為龍與以前不同，因而對她失望 以當攝影師為理想，拍攝一個關於香港的影集
布永存：	內在衝突： 外來衝突： 目標：	力量單薄，沒能力反抗政府 布販市場被政府收回 繼續當布販，平穩安渡餘生
黃天生：	內在衝突： 外來衝突： 目標：	想回到從前的日子，但好友龍卓驥因失意變了另一個人 社工突訪卓驥家，他正好在卓驥家，要幫助隱瞞 龍的事業失意 幫助龍卓驥振作
林家富：	內在衝突： 外來衝突： 目標：	為人老實、戇直、膽小，但要幫好友龍卓驥隱瞞騙綜援 幫卓驥隱瞞秘密，但動搖了自己過平淡生活的原則 想回到從前的日子，但龍因失意變了另一個人 社工突訪卓驥家，他正好在卓驥家，要幫助隱瞞 龍的事業失意 過平淡生活，少惹是非
李阮阮：	內在衝突： 外來衝突： 目標：	有愛心而正義，但現實的觀念與其理想世界滿有衝突 懷疑龍卓驥騙綜援 當個稱職的社工，幫助卓驥走出困境

第一場

時：日

地：辦公室

人：阿 Paul · 同事 A · 同事 B

△ 阿 PAUL 勤力地處理文件

△ 牆上時鐘顯示七點，旁邊的同事在打瞌睡

龍卓驥： (VO) 香港地有錢人好多，但係窮人仲多，如果你單身寡佬收入低過三千六，你就會被社會界定為貧窮人口，香港人口七百萬，有一百萬係窮人

△ 時鐘顯示十二點，阿 PAUL 仍然專注在工作，旁邊的同事懶洋洋在剪手指甲

龍卓驥： (VO) 古語有云：做窮人慘過隻狗。唔想做狗？其實唔難，只要你郁下個腦，就算攤大手板，每個月都有錢入你袋。靠勤力？咁不如去耕田！但，你有幾可見到隻牛會發達呢？

△ 同事示意阿 PAUL 去食飯，阿 PAUL 以一個報以笑容揮手拒絕，然後繼續工作

△ 同事 A 與 B 步出門口

同事 A： 條傻仔做到成隻牛咁都唔知係咪燒壞腦？

同事 B： 岩岩畢業出黎係咁嫁喇。行啦，唔好理佢

龍卓驥： (VO) 睇下呢位岩岩畢業出黎打工既阿 P A U L，佢既努力實在值得加許，但係...

△ 阿 PAUL 到櫃員機查看戶口，戶口剩下 \$ 49.5

龍卓驥： (VO) 咪就係躉居囉...唉，死做爛做得個桔。每個月戶口得返幾蚊刺，夠錢買個麥樂雞餐，都唔夠錢加大呀陰公。如果佢一早識用我既四大法則，就唔洗咁閉翳啦。香港地？最緊要識食腦。

第二場

時：日

地：郵局升降機

人：龍卓驥、阿姨、十位乘客

△ 龍卓驥急步跑至升降機，升降機門正在關閉

龍卓驥： 等埋！等埋！

△ 龍正好在門關上前按到門制，升降機門重新開啟

龍卓驥： 唔該晒...唔該晒..借過小小呀靚姐

△ 內裡擠滿了人，龍依然強行內進，把旁邊的大姐擠得喘不過氣來，大姐報以白眼，忽然升降機發出咄咄聲，龍裝作聽不到，左盼右顧

阿姨： 喂阿生！你可唔可以行返出去？

△ 龍裝作聽不到，繼續望天打掛

阿姨： 先生！！！！

△ 龍受不住大姐的咆吼，望一望阿姨

龍卓驥： 請問有乜野可以幫到你？

阿姨： 超重呀！你聽唔到唸唸聲嫁咩！？

龍卓驥： er... 呢層當然聽到，亦都睇到阿姨你身型超晒重

△ 阿姨怒髮衝冠

阿姨： 我唔同你計較咁多，但我諗全 LIFT 嘅人都會同意你離開

△ 眾人白眼龍卓驥

龍卓驥： 咦，阿姨你個仔個出面仆親喎，流血流到吧吧聲

△ 阿姨往外一望，龍趁機把大姐撞出升降機外，快速把門關上，
升降機門間看到龍的狡猾笑容

△ 畫面打出：法則一 寧苦他人 莫煩自己

第三場

時：日

地：郵政局內

人：龍卓驥、郵政局女職員 A、女職員 B、女職員 C、大叔、阿 Paul

△ 收件處有一個大叔和一個女職員

大叔： 搞撚左成星期！你地仲未開到個信箱畀我！？

女職員 A： 先生，如果你要...

大叔： 臭八婆！

女職員 A： 先生，你冷靜 d 先，如果你要開信箱，你要打一打個電話去另一個部門先，我地呢邊係...

大叔： 臭八婆！臭八婆！

女職員 A： ... 係處理唔到嫁

大叔： 我一早打撻左過去啦，佢地又叫我過黎搵你地，家下你地係咪玩野先，要玩我就陪你玩，我大把時間

△ 龍卓驥從升降機步出，見狀便想步急略過，免招麻煩

女職員 A： 我地都要跟返程序做野，並唔...

大叔： 我跟你老母呀！我理得你程序唔程序，總之我就要你而家開個信箱

△ 大叔擋住龍的去路，龍欲過去，卻不小心碰到大叔，大叔怒視龍

大叔： 呀靚仔，阿叔家下興過火屎，你仲就黎辣我呀？

龍卓驥： 英雄... 我又點會... 點會咁唔識做，我絕對！十分！非常對你既情況感到同情啦！

大叔： 咁就岩，你過黎同條臭八婆講兩句

△ 大叔一手抓住龍，龍逃不得，龍這時看到身旁有另一個女職員

龍卓驥： 等等先靚女... 我岩岩聽到你好似有啲意見喎

女職員 B： 我唔係...

龍卓驥： 唔係冇意見就岩，不如你過黎幫一幫呢位先生

△ 話畢，便一手把女職員推向大叔

△ 畫面打出 法則二 閒人勿幫，閒事莫理

大叔： 你又想講乜？唔好以為係女人我就唔敢鬧你！

△ 龍趁機逃走，剩下兩位女職員與大叔繼續對話，龍接著走到另一邊的窗口

龍卓驥： 靚女，唔該幫我寄左佢

△ 女職員給他處理包裹，龍把錢放在櫃枱

女職員 C： 先生，你呢度差八十蚊

△ 龍在褲袋翻來翻去，卻掏不出一個五元

龍卓驥： 哎呀，今日唔記得帶銀包，果一個幾毫咁濕星，幫我搞搞佢啦

女職員： (冷漠) 先生，如果唔夠錢麻煩下次再黎

龍卓驥： 呀小姐，好小可見到有女仔好似你 d 皮膚咁靚，一睇就知你份人
心底善良，我知你實會幫...

△ 女職員把「請稍後」的牌子放在桌上，然後走開，對龍的呼求
充耳不聞

龍卓驥： 喂喂喂...靚女...

△ 龍卓驥一臉不屑站在一旁想辦法，忽然呆頭呆腦的阿 Paul 在
一旁出現

龍卓驥： 喂，阿 Paul 好耐冇見

Paul： 咦，阿龍？

龍卓驥： 江湖救急，有冇一百蚊係身？

Paul： 我得八十蚊咋

△ Paul 慢慢從褲袋取出八十元，忽然又收回

Paul： 但就咁畀你好似唔係幾好，八十蚊咁大數目，有冇得寫借據？

龍卓驥： (不耐煩) 好喇好喇，拿，我呢有隻 Casio 真膠手錶，都值幾百
銀嫁，你拎住去先，當係抵押喇

Paul： (傻笑) 好呀，好呀

龍卓驥： 但我本身借你一百，你而家得八十蚊，姐係你仲差我廿蚊，下次我贖返隻手錶果陣，你就還返廿蚊畀我

Paul： (一臉滿足) 好呀，好呀

△ 阿 Paul 滿心歡喜以為執到寶，龍卓驥露出奸狡笑臉，畫面打出：法則三 為求目的 在所不惜

第四場 (與第五場 Intercut)

時：夜

地：龍卓驥家

人：龍卓驥，林家富，黃天生

△ 龍卓驥開機頂盒

△ 龍卓驥開着手機看足球賠率

△ 龍手機連着 WIFI

△ 龍卓驥的死黨林家富與黃天生到來

△ 三人一邊看球賽，一邊激動得大叫

黃天生： (激動) 入喇！入喇！唉！搞錯呀

龍卓驥： (指電視) 你呀你呀，係呀講緊你呀光頭仔！你食多碗飯先落場啦手軟腳軟！無飯食我請你呀！

林家富： (按手機) 喂，阿龍呀，你 WIFI 係咩呀？

龍卓驥： 你用 cci1313 啦

林家富： cci? 咩意思? 就算係你個名都應該係 lck 啦

龍卓驥： 車·上網洗申請嫁咩? (指)用隔離條友嗰個咪得囉

林家富： 下... 乜你咁嘅...

龍卓驥： 拿拿拿·係佢唔用密碼咋。

△ 門鈴響起

△ 龍卓驥開門

△ 陳凱光在門外

陳凱光： 喂·你有冇搞錯呀! 偷我 WIFI? 我今晚窒到波都睇唔到呀!

龍卓驥： 喂·你識唔識規矩嫁·WIFI 唔係私人就姐係公開嫁啦·你要幫政府宣傳公平公正公平開·我都係幫你一把姐·仲有·無我偷你 WIFI·你點會知自己保安意識咁弱先·呀諗諗下·我幫你上左堂·你好比返幾百蚊我添啲

△ 畫面打出：法則四 著數擺盡 道德其次

陳凱光： 好! 我宜家就即刻 set 返密碼·等你今晚波都睇唔到!

龍卓驥： (看看陳凱光身上的曼聯球衣·冷笑) 哈哈隨便啦·以你咁嘅知識水平·set 得黎都 3 比 1 完場啦

第五場 (Intercut 第四場)

時：夜

地：陳凱光家

人：陳凱光·Ken

△ 陳凱光在家看球賽，發現網速慢的非常，經常卡著

陳凱光： 點樣呀！玩野呀！

△ 陳凱光打電話

陳凱光： 喂，阿 Ken，今晚唔知咩事睇波勁窒呀

Ken： (OS) 下，會唔會係 WIFI 收得唔好呀，你移下啲天線

△ 龍卓驥家極嘈吵

陳凱光： (不耐煩，掩着一邊耳) 哦，你等等，我上一上天台線搞先

Ken： 你 WIFI 天線呀！唔係你電視呀

陳凱光： 妖係啲！ (看一看球賽畫面) 頂，三比一喇！

△ 陳凱光移動 WIFI 天線

陳凱光： 喂，都係窒啲，成日筆化拎筆化拎 (buffering buffering) !

Ken： 一定係你個 WIFI 太廢啦！

陳凱光： 算喇！聽日申請個 Now 算！

△ 陳凱光一直聽到龍卓驥家傳來不少聲音，當中更是支持敵隊的聲音，於是勃然大怒

陳凱光： 呀！搞錯呀！嘈到咁！

△ 陳凱光走至龍家門外，打算按鈴之時，卻在門外聽到龍卓驥與朋友的對話，說是偷陳凱光家的 WIFI

△ 陳凱光聽後回家，打電話

陳凱光： 喂阿 Ken

Ken： 點樣

陳凱光： 我好似比人偷 WIFI 線呀

Ken： 下，你 WIFI 冇 set 密碼嫁咩？

陳凱光： 鬼知咩，用到咪得

Ken： 你開返 WIFI 個 SETTING

陳凱光： WIFI setting...

Ken： 係呀... 踢啦喂！搞錯呀！咁都唔射

陳凱光： 喂，快 d 啦咩 setting 呀

Ken： 妖網址打 192.0.0.1，網址打呀...快啦！輸緊 3 粒喇！搵尾二個個

陳凱光： 喂？有六部機連緊嘅喂

Ken : 六部？咁搞法，你睇 AV 都變成書啦！哎吔！好彩唔入！

△ Ken 掛線

陳凱光： 六部？！班蛋散呀！

△ 陳凱光與龍卓驥口角後，回家後打電話

陳凱光： 喂阿 Ken 呀

Ken： (不耐煩) 又點呀...

陳凱光： 教我 set WIFI 密碼！

第六場

時：夜

地：唐樓天台

人：龍卓驥、布永存

△ 龍卓驥伏在天台一角移動著天線，鬼鬼祟祟的

龍卓驥： (自語自語) 四眼仔咁招積？整鋪杰野你嘆下！一拍兩散！

△ 布永存上到天台,從入口看到龍卓驥

布永存： (大叫) 喂！後生仔！你咪呀你！

△ 龍卓驥回頭一看

龍卓驥： 吓？

布永存： 我話你呀，你咪呀你！

龍卓驥： 吓？

龍卓驥： 你講乜呀阿伯，你過主啦，返落公園捉棋啦

△ 布永存無視龍的話，慢慢走近龍卓驥

布永存： 年輕人，你...

龍卓驥： (打斷) 我都話叫你唔好行過黎囉

布永存： 你今年幾歲？

龍卓驥： 吓？

布永存： 我諗你咁後生都唔知嫁喇，深水涉早幾十年同而家好唔同

龍卓驥： (VO) 死喇...夜媽媽撞著個痴線佬

布永存： 每日經過深水涉都人多車多，呢點真係一D都冇變，想搵下林審野可以去鴨記，想話買玩具畀細蚊仔，又可以兜轉去玩具街... 雖然表面好似冇乜變咁，但其實以前深水涉仲熱鬧過而家，冇啦，食環管得咁嚴，舊時邊係咁嫁？舊時通街都係小販，而家郁D就話人阻住條街...

龍卓驥： (VO) 個阿伯仲想講幾耐？

布永存：（手指著對面樓）你望下對面座大廈

△ 龍卓驥的眼跟著布永存的手指望向對面，然後看了良久，但甚麼也沒發現

龍卓驥：乜都冇啲阿伯

布永存：係呀，以前真係乜都冇

第七場（Flash back）

時：日

地：深水埗欽州街一帶

人：眾路人

△ 畫面回到七十年代，大廈的位置變成一舊平地

布永存：（VO）以前D樓邊有咁高架，唐樓頂盡咪三層

△ 畫面繼續前去，兩邊盡是唐樓，街道上有很多小販在擺賣，然後從窗子進了其中一户人家，家中的人在做手工業

布永存：（VO）男主外，女主內，老豆出去返工，老母留係屋企，湊下細路之餘，冇時間咪穿下膠花幫補下家計，果一代，肯勤力邊會餓死？

△ 畫面從另一口穿出，回到地面，一班布販在賣布

布永存： (VO) 我以前都係呢頭賣布，搵大錢就唔洗諗嫁喇，但總算叫做腳踏實地，都搵到兩餐晏仔

△ 賣布的小販們突然慌張起來，其中一位就是年輕的布永存，他們向前跑，從後而來的，是一群小販管理隊

布永存： (VO) 但做得呢行，腳骨力就唔少得，畀 d 捉鬼隊捉到又唔見幾百銀。後來，唔知係咪我地跑得太快，捉鬼隊都費鬼事捉我地，政府就索性發埋個牌畀我地，成班布販就搬晒入棚仔

龍卓驥： (VO) 棚仔？

布永存： (VO) 姐係深水涉布販市場，呢，係欽州街果頭既呢

龍卓驥： (VO) 少去果頭

△ 棚仔的外面人來來往

布永存： (VO) 以前果頭都幾雜下，人多唔再講，係正隔離就有個越南難民營，班越南佬成日係度北漏洞拉、北漏洞拉，都唔知佢地噏乜，有時 d 街坊都搞唔清究竟棚仔係難民營，定對面先係難民營

龍卓驥： (VO) 查實你仲要講幾耐？

第八場 (flashback)

時：日

地：深水埗布販市場

人：布永存、三嬸、明仔、設計系學生 a、設計系學生 b、設計系學生 c

△ 九十年代棚仔內，布永存在檔口營業，五歲的明仔脫光光地檔外玩三輪車

△ 三嬸從旁邊的檔走過來

三嬸： 存叔，可唔可以幫我睇住明仔先，我老公叫我過去幫佢拎 d 布辦

布永存： 冇問題，冇問題，明仔過黎啦！

三嬸： 麻煩晒你呀存叔，成日要你幫忙

布永存： 唔麻煩，唔麻煩，大家隔離鄰舍，互相幫忙下好應該既

△ 三嬸話畢就轉身離開，布永存欲上前抱起明仔，明仔加速，躲開布永存

布永存： 明仔你真百厭，唔好踩咁遠呀，係附近好喇

△ 明仔無視布永存的話，自己踏著三輪車在附近蹣跚

△ 有幾個設計系學生在附近檔口看布，設計系學生 a、b 在揀布，設計系學生 c 只有半身入鏡，看不見樣子

設計系學生 a： 今次份 assignment 要整唐裝，真係 r 爆頭，你地話用咩布好？

設計系學生 b： 呢層我都唔清楚，冇乜呢方面既知識

設計系學生 a： 咁呀，惟有一路行一路睇，睇岩就試下

設計系學生 b： 惟有係咁

△ 設計系學生繼續前行，走到布永存的檔口

設計系學生 a： （摸著其中一匹布）呢匹好似唔錯，我覺得可以試一試

設計系學生 b： （伸手去摸）係啱，質地唔錯

布永存： 細佬，想造唐裝呀？

設計系學生 a： 係呀，唔該我想要呢匹

布永存： 呢匹唔好，做唐裝一定要用苧綢

設計系學生 b： 苧綢？

布永存： （從另一端取出苧綢）拿，呢種就係苧綢，佢係以蚕絲作為原料，經過加工後，就變成一種非常適合做唐裝既布，係上面繡花十分之方便

設計系學生 a： （摸一摸布）你唔講真係唔知，多謝你呀大叔

設計系學生 b： 可唔可以畀一碼我地？

布永存： 一碼？你地初哥未必夠用啱

設計系學生 a： 但係...我都有咁多錢

布永存： 冇冇怕，見你地係學生，私人送多幾吋畀你地

設計系學生 b： 點得呀？大叔你都係打開門做生意

布永存： 男人老狗唔好咁婆媽，第時多 d 黎幫襯咪得

設計系學生 a： 咁呀... 好啦！我應承你，件衫造好就第一個搵你做 model
試著

布永存： 哈哈... 好呀！

第九場（接第六場）

時：晚

地：唐樓天台

人：龍卓驥、布永存

龍卓驥： （恥笑）邊有人好似你咁戇居嫁？做蝕本生意都有既？

布永存： 幫下人又有乜所謂？

△ 龍卓驥停下手中工作，拿起工具箱，向天台出口走去

布永存： 吓！年輕人你咁夜上黎..係...

龍卓驥： （狡猾的笑）係呀！整一整條天線咋，我落返去樓下喇，唔同你
講

第十場

時：晚

地：陳凱光家

人：陳凱光、ken

△ 陳凱光與 ken 在看電視，忽然畫面變成雪花

陳凱光：（驚訝）搞乜呀！？唔係連 tvb 都睇唔到呀？

第十一場（接第九場）

時：晚

地：龍卓驥家

人：龍卓驥、林家富、黃天生、電視主角 a、電視主角 b

△ 卓驥從大門入屋，林家富與黃天生在看電視

林家富：搞乜搞咁耐？

龍卓驥：鬼咩？係樓上撞到個傻佬！

黃家富：吓！發生乜事？

龍卓驥：唔好提喇，整罐啤酒黎飲下先

林家富：快 d 過黎坐，就開始喇！

△ 電視中浮起《窮人大作戰》的片頭

電視主角 a : 你個死窮鬼，真係冇鬼用！

電視主角 b : 我係窮，但係我有理想！

△ 忽然劇中主角的背後有一個跑龍套走過，正正是龍卓驥

第十二場

時：日

地：片場

人：龍卓驥、跑龍套領班、導演、電視主角 a、電視主角 b

電視主角 a : 你個死窮鬼，真係冇鬼用！

電視主角 b : 我係窮，但係我有理想！

△ 主角的背後有一個跑龍套走過，是龍卓驥

導演 : Cut!!! 大家抖陣，再黎下一個 take !

△ 龍卓驥鬆一口氣，慢慢走向跑龍套領班

龍卓驥: (搓著手，陰嘴笑) 阿頭

領班 : 知你攞野嫁喇

△ 領班從褲袋掏出現金

龍卓驥 : 多謝多謝！

△ 龍卓驥傻笑

龍卓驥： 係呢，有冇人同你講過，阿頭你呢排 fit 左，d 兩頭肌三頭肌都出晒黎

領班： 係咩？哈哈？得你先留意到，我呢排勤力左去做 gym

龍卓驥： 呀，係呀，我下個月二表哥三表哥都結婚，手頭好緊，如果有通告拍硬檔畀我先

領班： 吓？上個月先聽你話二表哥今個月結婚咋咯，佢重婚呀？

龍卓驥： 哦，上個月果個係二堂哥黎，冇計啦，親戚多，拜託晒

領班： 知喇！知喇！有通告 call 你

△ 領班不耐煩走開了

龍卓驥： 係既阿頭！收到阿頭！好聲行呀阿頭！

△ 畫面打出：法則三 為求目的 在所不惜

龍卓驥： (VO) 隻死肥豬丫，鬼唔望你仆死

第十三場

時：晚

地：大廈大堂

人：龍卓驥

- △ 龍經過大堂信箱
- △ 信箱內有一份大公文袋，上面寫著寄件者是 Mary
- △ 龍看到興奮得立刻跑進升降機內
- △ 信箱內剩下一封信件沒拿
- △ 信封上寫著「政府郵件」

第十四場（接十一場）

時：晚

地：龍卓驥家

人：龍卓驥、林家富、黃天生

- △ 龍卓驥蠻牛般衝進屋內

林家富： 嘩，做乜咁急呀？

黃天生： 做咩呀，急屎呀？

- △ 龍卓驥沒理會，急不及待把公文袋拆開
- △ 公文袋內是一副謎語拼圖
- △ 龍細心解謎，不時甜笑
- △ 林與黃見狀，心照不宣

林家富： 又係個女仔寄黎呢

黃天生： 你睇佢嘴角含春咁嘅樣，實係啦！

△ 林與黃上前看龍的包裹

黃天生： 咩黎嫁？

龍卓驥： 關你咩事

黃天生： 都咁多年啦

林家富： 阿龍呀，其實你三十歲人，都好應該成家立室啦

黃天生： 所謂「女人三十爛茶渣，男人三十一支花」，你打開度門行出街，一街都係女，做乜要浪費青春係啲茶渣身上

△ 龍卓驥臉有難色，呆住了

△ 林家富見龍卓驥毫無反應，用手在他眼前掃了幾下

林家富： 死喇，冇埋反應

黃天生： 冇得救嫁喇佢，你睇佢，瞳孔都收縮埋，都唔知係咪畀人落情降

龍卓驥： (喃喃自語) 佢要返黎...

黃天生： 下？你又講乜鬼

龍卓驥： (大叫) 佢要返黎呀！

第十五場

時：晚

地：街道

人：Mary、龍卓驥

△ 龍卓驥獨自在車房門外等候著

△ 遠方有一個黑影慢慢行來，正好走到街燈下，光線照亮下，

MARY 的臉孔清晰可見

△ 龍卓驥初時並沒為意，忽然看到 Mary 在眼前出現，嚇了一跳

△ 兩人相視，不作一聲

Mary： 好耐冇見

龍卓驥： (苦笑) 係呀，真係好耐

△ Mary 輕輕一笑，笑靨如花

△ 龍看着 Mary，被她的笑迷得呆掉

Mary： 喂... 我約左你老地方等嫁 WOR，做乜企左係車房？

龍卓驥： (望一望車房，有點感慨) 呢度咪老地方，都八年喇，乜都變晒喇

第十六場 (接十五場)

時：晚

地：海傍

人：Mary、龍卓驥

△ 兩人坐在海傍，各自拿著一支啤酒

Mary： 估唔到只係過左八年，香港就變左咁多

龍卓驥： 起一幢樓要用一年，但拆一幢樓只係需要十秒。八年？完全足夠
香港面目全非，你認得路已經好好

Mary： 都係既...以前熟悉既路都變得陌生..不過好彩人就始終都係果 D
人，好似你咁丫，完全無變，仲係咁既樣

龍卓驥： (輕聲) 我都變左好多喇

Mary： 吓？

龍卓驥： 哦...冇野。係喇，咁多年黎你外國過成點？

Mary： 總算冇白費，叫做實現緊理想，初頭果兩年讀攝影係有 D 辛苦，
人生路不熟，好彩後來讀讀下遇到個賞識我既老師，我而家就係佢 STUDIO 做，
一邊學野，咁就過左八年

龍卓驥： 咁都幾好

Mary： 諗返起都要多謝你

龍卓驥： 我？

Mary： 係呀，如果當初唔係你叫我鼓起勇氣出國嘗試，我諗都冇今日既
我

龍卓驥： 哈，邊關我事，你既成功係你努力得來既結果

Mary： 咁你呢？我記得你大學讀 Fashion Design 果陣好有才華，成日擺獎。有一年仲整左條裙畀我做生日禮物，我仲 keep 到而家嫁

龍卓驥： (緊張) 哈...過獎喇...小意思姐

Mary： 你係邊間行做緊？

龍卓驥： (滿頭大汗) 哦..... G&G 囉，都做左幾年，叫做係 Senior 囉，不過可能遲下轉去其他地方試下新野

Mary： G&G 大行黎啲，不愧係阿龍。係喇，你而家住邊頭，我過幾日想上黎坐下，唔知會唔會打攞你？

龍卓驥： 吓？

第十七場

時：日

地：龍卓驥家

人：龍卓驥、林家富、黃天生、李阮阮

△ 龍卓驥與林家富、黃天生焦急地收拾家居

龍卓驥： 你兩個快手啦，MARY 就快上黎喇

黃天生： (不耐煩) 得喇得喇，包搞掂

林家富： (撿起桌上一堆花生殼) 邊個琴晚食完 D 花生又唔丟？

△ 門鈴突然響起

- △ 林家富嚇得把花生跌在地上，三人面面相覷，呆了數秒
- △ 門鈴再次響起
- △ 黃天生一腳把花生掃推沙發底
- △ 他們落力收拾，家居在數秒內被收拾得十分整潔
- △ 林家富與黃天生氣喘吁吁，向龍卓驥作個OK手勢，龍整理一下衣服就上前開門

李阮阮： 你好，係咪龍卓驥先生？我係社署社工李阮阮，之前寄過信黎，約好左今日做家訪

- △ 龍卓驥嚇得呆木若雞，不消一秒把大門砰一聲關上
- △ 三人六目交投，畫面一黑
- △ 大門再次開啟，從阮阮的視角看進去，大屋再次變得凌亂，還原到收拾之前

李阮阮： 你好，係咪龍卓驥先生？我係社署社工李阮阮，之前...

龍卓驥： （裝作鎮定）好呀..你入黎先

- △ 兩人慢慢走進大廳，黃天生與林家富坐在沙發看電視，換上破舊的衣服

李阮阮： 龍先生你拎左綜緩都有一段時間，今次循例家訪，睇下你拎完綜緩之後既情況

龍卓驥： 好呀好呀

李阮阮： 請問呢兩位係？因為根據返資料，龍先生你好似係一個人住...

龍卓驥： 哦...佢地...佢地...佢地..佢地係我遠房親戚，呢個係我二叔，呢個我係我三叔

△ 龍打眼色給黃天生

黃天生： (鄉音) 龍仔，做乜帶朋友上黎都唔通知我地，等我一陣落去街市買條靚魚

李阮阮： 客氣喇，唔洗嫁喇，我坐一陣就走嫁喇

龍卓驥： 唔洗嫁喇二叔，佢好快走嫁喇

李阮阮： (耳語) 點解你二叔同三叔年紀咁輕既

龍卓驥： 哦... 我阿婆成九十幾歲先生佢地出黎，仲要係雙胞胎，你睇佢地兩個幾似樣

△ 李阮阮望向黃與林，兩人陰險的笑

龍卓驥： 呀...!!! 你坐下先啦，企左咁耐都冇嫁喇

李阮阮： 唔洗住，我想周圍下行先，了解下你既生活環境

△ 說罷，李阮阮徑自走向睡房，龍卓驥大驚

李阮阮： (邊走邊說) 如果你既基本津貼係唔夠生活，其實我地仲有其他津貼可以申請，但你知嫁啦，我地就唔容許申請人私底下出去賺外快，如果發現戶口多左錢，我地都會查嫁

龍卓驥： 我當然知道喇，我又點會做D咁既野

△ 李阮阮走到睡房門前，欲進去看看

△ 抽屜還未關好，入面有龍當跑龍套出工資的信封

△ 龍大驚，李阮阮越走越近

黃天生： (鄉音) 嘩！成隻貓咁大既老鼠都有

△ 李阮阮大驚，龍卓驥趁機把抽屜關上，李驚得跳到床上，正好
撞到龍，龍的手指被抽屜夾住了

△ 龍痛得面紅耳赤

李阮阮： 邊度丫!!!! 邊度!!!

黃天生： (鄉音) 而家電視D立體特效又幾迫真

△ 李阮阮鬆一口氣，從床上回到地下

李阮阮： 唔好意思，踩到你張床，係喇，做乜面都紅晒既

龍卓驥： 哦...琴晚飲左支紅棗水，D血谷上腦姐

李阮阮： (輕聲) 紅棗水會咁勁嫁咩？今晚買返支補補先

龍卓驥： 吓？

李阮阮： 哦冇，咦你岩先跌左個信封落地下

△ 龍大驚，李阮阮伸手去撿起，忽然大廳傳來巨響

△ 龍與李出去一看，林家富在地上不停抽搐

李阮阮： 嘩！又發生乜事？

黃天生： （鄉音）佢發羊吊呀！

龍卓驥： （裝作驚慌）唔好震喇三叔，快啲起身喇

李阮阮： 唔洗驚！我識急救！

△ 李阮阮隨手拿起地上一隻拖鞋，塞進林的口中，再施展口外壓

龍卓驥： （低聲）乜發羊吊係要做心外壓嘅咩？

△ 黃天生搖頭，兩人袖手旁觀

△ 李阮阮每施一下心外壓，林家富的樣子就越痛苦，最後沒了知覺

黃天生： 死喇，冇埋反應

△ 龍卓驥捉起李阮阮

龍卓驥： 夠嫁喇，夠嫁喇，我諗佢冇事嫁喇，你睇佢都冇震喇，仲訓得幾安詳

李阮阮： 唔得嫁，起碼要叫架白車先

黃天生： 唔洗嫁喇！佢....咳咳（轉鄉音）佢冇事嫁喇，抖陣就好，佢周不時都係咁

李阮阮： 真係？

龍卓驥： 係呀，不如你今日走先啦，第日再黎，我地要照顧下佢先

李阮阮： (不情願) 好啦，佢真係冇事？

龍卓驥： 冇事冇事！！放心！

△ 龍卓驥送阮阮出門，兩人鬆一口氣

龍卓驥： 阿富，多得你咁好演技咋

△ 兩人望向林家富，林家富在地上嘔白泡

龍卓驥： 阿富....？

第十八場 (接十七場)

時：日

地：龍卓驥家外的走廊

人：李阮阮、Mary

△ 李阮阮從龍的家出來

△ Mary 從升降機出來，兩人相視一笑

△ Mary 繼續走往龍的家

第十九場（接十八場）

時：日

地：龍卓驥家

人：龍卓驥、林家富、黃天生、Mary

△ 門鈴響起，龍卓驥開門

龍卓驥：（鬆一口氣）你終於黎喇？

Mary：唔好意思遲左少少

龍卓驥：（輕聲）唔緊要，你早到仲麻煩。（正常聲量）你入黎坐下先

△ 龍卓驥領 Mary 到大廳，黃天生與林家富正坐在沙發

Mary：咦，你有朋友係度？

龍卓驥：佢兩個係我老死，阿富同天生

黃天生：嗨

林家富：（沒氣）嗨

Mary：（驚訝）阿富你嘴角有啲泡，冇事丫嘛？

龍卓驥：哦，佢冇野，佢唔夠訓咋

林家富：（沒氣）係呀，琴晚廚房爆左屎渠，一搞就搞到天光，我抖下就得嫁喇

△ 說罷，林家富雙眼反白

Mary：（疑惑）好啦...咁..你抖下先，但屎渠係係駁落廚房嫁咩？

黃天生：渠呢家野，係亂咁駁嫁喇

Mary：哦...係喇岩岩見到有個女仔係你屋企走出黎，佢都係你地嘅朋友？

黃天生：果個係阿富前女友，上黎拎返啲野

龍卓驥：唔好提啲傷心野，係喇你返左黎香港幾日，習慣未呀？

Mary：還可以呀，係有少少時差姐。

△ Mary 環顧四周

Mary：你呢度又幾骨緻，不過估唔到你會揀唐樓住，以你性格，仲以為你會住 d 風格好特別嘅私樓

龍卓驥：呢度地方大，屋租平，仲有陣本土味

Mary：我都覺，深水埗呢箇地方真係好香港

龍卓驥：香港人緊係要似返住香港啦，而家啲私樓下下都扮晒鬼佬豪宅，改個名都難讀過人，住著果度，真係坐小巴都唔知點叫有落

Mary：你對香港本土都幾有 sense，睇黎可以搵你幫手

龍卓驥： 幫手？

Mary： 其實我今次返黎香港除左探下老朋友之外，仲想拍攝一個關於香港本土既影集

龍卓驥： 咁...我可以點幫到手？

Mary： 做我嚮導囉，我諗你唔會拒絕我掛？

龍卓驥： 都可以嘅....

Mary： (一笑) 咁就好，今個星期日有個展覽，可唔可以陪我去先？之後我地再一齊去影相？

龍卓驥： (勉強) 好.....

△ 黃天生煞有介事地望著龍卓驥

第二十場

時：日

地：社署

人：龍卓驥、李阮阮

△ 龍卓驥從升降機出來

龍卓驥： (喃喃自語) 展覽？靚衫都冇套，點攞呀？

△ 龍卓驥走進辦公室

△ 李阮阮正好在一旁經過

龍卓驥： 阮阮姑娘，你係度就岩喇

李阮阮： 龍先生？你上黎搵我？

龍卓驥： 哦，我上黎係想交份配眼鏡既資助申請表，最近 d 近視又深左

李阮阮： 但係...我記得龍先生你好似冇近視嫁喎

龍卓驥： 我意思係... 我最近先發現自己有近視，一發現已經三百幾度，視光師話好彩我發現得早咋，如果遲 d 發現可能會盲添呀

李阮阮： 咁嚴重？等我而家幫你處理先

△ 畫面打出：法則四 著數擺盡 道德其次

第二十一場 A

時：日

地：工廈

人：Mary、龍卓驥、李阮阮、Katarina、店主

△ Mary 獨個兒站在工廈展覽的門外等候

△ 龍卓驥一身燕尾服隆重打扮出現，Mary 見後捧腹大笑

Mary： (大笑) 阿龍你搞乜著成咁？

龍卓驥： 又係你話有展覽，等我仲以為係 d 會展高級展覽，邊估到原來係呢 d 工廠

Mary : (大笑) 唔得喇 , 就笑死我。唔緊要啦 , 都幾靚仔丫 , 照行啦

△ 龍卓驥十分尷尬 , 然後兩人走進工廈展覽

△ 沿途路人目光也集中在龍卓驥身上

龍卓驥 : 成世人都未試過咁出位

Mary : 咁咪好囉 , 成個明星咁

△ 沿路不同的展室陳列著各有不同的藝術品

龍卓驥 : 呢個展覽都幾大卡士 , 啲展品都..都幾有個性

Mary : 呢個展覽嘅參展者 , 全部都係本土嘅 artist , 我今次黎諗住擺下
靈感

△ Mary 走到另一側看展品 , 而龍就走到另一端

△ 其中一項展品 , 是一個漱口樽內裝著一支牙刷

△ 龍望著該展品 , 而在旁也有一個奇怪打扮的路人在看

龍卓驥 : 唔係掛 , 呢個都算藝術品 ?

路人 : 睇你點界定啦

龍卓驥 : 咁又可以點界定呀 ?

路人 : 只要個 artist present 到個 art work 想講乜咪得

龍卓驥 : (揶揄) 咁你又係呢個 art work 到 get 到啲乜咁呢 ?

路人： 你 get 唔到係因為你資質太低

龍卓驥： 你...

Mary： (打斷) Katarina!! 點解你係度嘅?

Katarina： Mary?? 好多年冇見喇 返左黎香港都唔通知聲

Mary： 我都係呢兩日先返黎

Katarina： (上下打量龍卓驥) 你朋友?

Mary： 係呀，佢叫阿龍呀。岩喇，阿龍都係 Designer 黎嫁，介紹畀你
識就岩晒

Katarina： (不屑一笑) Designer? 睇得出，一睇佢呢身打扮，就知佢係
designer 啦，著到成個 G2000 代言人咁

龍卓驥： 你呢身打扮都唔弱，成個亞瑪遜神婆咁

Mary： (尷尬) 好喇好喇...不如去前面睇下其他野

△ Mary 與 Katarina 行前，龍卓驥緊隨其後

△ Katarina 對沿路的展品指手劃腳，解說給 Mary 聽，而龍在後
一直默不作聲

△ 他們三人走到一個賣旗袍的攤位

△ Katarina 拿起其中一條旗袍

Katarina： 呢條旗袍既印花幾特別丫，可惜織法同用料都唔 Match

△ 店主臉有難色

Katarina： 如果轉用綿麻就好

Mary： 係呀？

龍卓驥： 店主咁做係有佢用意既，用綿麻唔係唔好，只不過就唔夠貼膚，唔太適合香港地經常郁動既女性。如果用返店主採用既絲綢，除左貼膚，彈性都夠高，可以突顯身型既優點外，仲合乎現代都市女性既平日活動，帶出新式旗袍既時尚

△ Katarina 面有難色

Katarina： （尷尬）講得幾好呀，但我都係覺得綿麻 fashionable 同 high class d 囉。Mary，我諗呢度都唔係幾岩我嘅 taste，我走先，同阿代言人慢慢睇啦下

△ Katarina 獨自離去

△ Mary 向著龍卓驥微笑

Mary： 不愧係時裝界既尖子呀

龍卓驥： 邊係，我亂噏兩句

店主： 呢位哥哥仔真係識貨，難得搵到知音，拿，呢條裙就一折賣畀你，畀你送畀女朋友仔啦

龍卓驥： 點過意得去呀

店主： 唔洗客氣，你幫我吐左口污氣

龍卓驥： 你鐘唔鐘意？

Mary： 你送到，我就唔客氣要左佢

△ 龍卓驥從銀包掏出一張五百元給店主

△ MARY 接過禮物後便先前行

△ 龍卓驥與店主四目交投

店主： 先生，多謝晒，好聲行

△ 龍卓驥依然不走

龍卓驥： 老闆，你好似漏左D野

店主： 下？

龍卓驥： 找錢呀！

店主： 哦...先生，件旗袍原價五千，折左之後都要五百，無多無少，岩好嫁喇

龍卓驥： (臉色一沉) 哦，咁好啦，唔打攞你做生意

△ 龍卓驥背向店主一走，店主陰險的笑

△ 龍卓驥也陰險的笑，手上拿著原先的五百元

龍卓驥： (VO) 估到你攞野啦，想呢我？過多十年八年啦

△ 畫面打出：法則四 著數擺盡 道德其次

Mary： 做乜笑得咁開心？

龍卓驥： 哦冇，岩岩執到金姐

△ 龍卓驥在轉角處看到李阮阮的身影

龍卓驥： 不如行另外果邊，岩岩有個展區未睇完，想睇多次

△ 龍卓驥走到另一邊展區，又看李阮阮的身影

△ 龍卓驥再走到另方向，依然撞到李阮阮

龍卓驥： 都行得七七八八，不如走囉

Mary： 但我仲有幾個展區未睇

龍卓驥： 時間都唔早嫁喇，我地仲要去第二度

Mary： 咁好啦....

△ 龍卓驥帶著 MARY 離開工廈，龍卓驥鬆一口氣

第二十一場 B

時：日

地：工廈

人：龍卓驥、李阮阮、Mary、店主

△ 李阮阮在旗袍攤檔看旗袍

店主： 用料好靚嫁，隨便睇下

△ 李阮阮看見龍卓驥的身影

李阮阮： (VO) 前面果個咁似龍先生既，冇理由嫁，著到身光頸靚，之前又話有幾百度近視，但又唔見佢戴眼鏡

△ 阮阮露出疑惑的神色，跟縱這個身影

△ 身影一到轉角處就不見了

△ 阮阮在另一個展區尋找，龍在遠方看見閃走，阮阮不見龍

第二十二場

時：日

地：社署

人：李阮阮

△ 李阮阮獨坐在辦公室內翻查資料

△ 她拿出龍卓驥的文件夾

△ 她先仔細翻閱住屋申報表，再仔細查看每一張帳單

△ 她露出疑惑的表情

第二十三場

時：日

地：深水埗布販市場

人：龍卓驥、Mary、布永存

△ Mary 與龍卓驥步入布販市場

△ 門外寫著「不遷不拆」等多個標語

龍卓驥： 呢度搞乜？個門口畫到鬼五馬六咁

Mary： 新聞話，呢度就黎要拆，你做 design 應該知嫁？

龍卓驥： (慌張) 知！緊係知啦，我意思係個門口做乜畫到咁姐

△ Mary 沿路不停拍照，拍下布販的日常

布永存： 後生仔！

△ Mary 與龍卓驥依然在前拍照，聽不到後方布永存的聲音

布永存： 後生仔！

△ Mary 聽到布永存的聲音於是轉身

△ 龍卓驥看到是布永存，便裝作看不見

布永存： 喂呀！後生仔，叫你呀！

Mary： 阿龍，佢好似叫緊你㗎

龍卓驥： 邊係呀，我都唔識啲咁嘅人。(VO) 又係個傻佬？

△ 龍卓驥搭著 Mary 的膊頭，想帶她快點離去

布永存： 喂，叫你呀，阿賓叫狗越叫越走都有嘅

Mary： 唔係嗰，佢好似真係叫緊你

布永存： 後生仔，好耐冇見，咁都畀我撞到你

△ 布永存上前捉住龍卓驥的手

龍卓驥： (尷尬) 哈... 阿伯，乜又係你呀，咁得閒落黎打薑呀？

布永存： 乜打薑呀？我係度開工嫁，上次咪同你講過囉

龍卓驥： 係咩...係咩...？

Mary： (興奮) 叔叔你係度擺檔？

布永存： 叫我布佬得嫁喇，我擺左檔大大話話都三十幾年

Mary： 咁就岩晒，我讀攝影既

布永存： 乜影話？

Mary： 攝影呀，我黎緊會做一本影集，我可唔可以同你影兩張相，做個訪問？

△ 龍卓驥將 Mary 捉到一旁

龍卓驥： 我同個阿伯唔係咁熟嫁咋，況且佢精神好似有 d 問題咁

Mary : 唔緊要啦，機會難得呀

△ Mary 甩開龍卓驥，走到布永存前

△ Mary 開啟相機的錄影功能

Mary : 可唔可以呀，布佬叔叔？

布永存 : 都話叫我布佬就得，唔知你乜影乜集，你有問題隨便問，反正我有空間

Mary : 咁我而家問你幾條問題

布永存 : 隨便隨便

△ Mary 等了一會，想了想

Mary : 你後生果陣點解會選擇做布販既？

布永存 : 都幾十年前喇，冇話咩選擇唔選擇既，以前邊得黎咁多選擇？選擇揀人，多過人揀選擇既，人人都係得一雙手，你唔做，唔肯試，咁咪等餓死囉。都係搵食啫，咁岩得咁橋，果陣我舅母又係賣布，廿歲出頭，都想學返門手藝，咪跟佢搵食，後來佢老，唔做，咪我自己做，一做就做到而家

△ 龍卓驥在一旁打呵欠

Mary : 咁...你做咁耐布販，開唔開心？又或者，有冇乜感受？

布永存 : 開唔開心？哈，冇諗過，都係咁生活嫁喇。八點開檔七點收檔，都習慣左喇。不過大家左右隔離得閒打下牙較，又幾過癮既。有時行開行埋，

左右隔離又幫手睇下檔咁，你幫我，我幫你，都幾好。你知啦，做我地呢行，
d 客仔來來去去都係果班，黎得多都熟喇，咁又多班老友。

△ 三嬸在一旁經過

三嬸： 布佬，有客仔呀？

布永存： 係呀，一陣傾一陣傾

△ 六嬸向龍卓驥和 Mary 打招呼

△ Mary 回以微笑

布永存： 你繼續，你繼續

Mary： 我入黎果陣係門口見到呢度就清拆，咁之後你有乜打算？

布永存： 我呢副老骨頭，仲可以去得邊？我二十歲出頭做到而家，呢度就
係我所有，班家產，對唔住，班友仔一個唔該就話要收返呢度，你話喇，我
仲可以去邊？都咁多年

△ 布永存一面愁容

△ 龍卓驥在一旁打呵欠

△ Mary 不滿意望一望龍

布永存： 我地辛辛苦苦經營左個社會咁多年，老左，冇用喇，班後生就要
掃走我地，棚仔冇左，好多野都冇左。要發展，就不停起樓，就黎連香港都冇

△ Mary 的相機近鏡影著布永存半哀半怒的臉孔

第二十四場

時：晚

地：龍卓驥家

人：林家富、黃天生、龍卓驥

△ 龍卓驥心事重重地坐在沙發，黃天生在看報紙，林家富在沙發看電視

林家富： 佢又做乜？

黃天生： 唔鬼知佢，撞邪掛

△ 三人繼續各自各做自己的東西，長達數分鐘的沉默

龍卓驥： 今日呢，我見到李阮阮跟蹤我

△ 黃天生與林家富大驚，黃天生把報紙跌在地上，林家富則跌了遙控在地上

黃天生： 你...你...你講多次

龍卓驥： (冷靜) 我話，今日我見到李阮阮跟蹤我

黃天生： 咁點算呀！？

龍卓驥： 冇得點算，想避都冇得避嫁啦

林家富： 都叫左果陣唔好出古惑嫁喇，乜野虛報資料呢綜緩，你睇！而家搞出個大個佛。畀人查到，分分鐘監都有得你坐

龍卓驥： 過兩日我要上社署搞續領，如果收手就襯呢個機會

林家富： 一於收手啦，你又唔係右手右腳，做乜要呃綜緩姐，我唔想睇住你出事阿龍

△ 黃天生望一望林家富

黃天生： 阿龍，單野做果陣我地撐你，而家你點選擇我地都撐你

龍卓驥： 我想一個人落去行下

△ 龍卓驥說畢便打開大門走了出去

△ 林與黃看了對方一眼，感擔心

第二十五場

時：日

地：社署

人：龍卓驥

△ 龍站在社署門外

△ 他露出迷茫的表情

第二十六場（接二十四場）

時：晚

地：龍卓驥家

人：林家富、黃天生

黃天生： 真係唔想睇住阿龍出事

林家富： 唉，如果可以返返去以前就好

黃天生： 果時我地 b hall 三劍俠，過得不知幾快活

△ 林家富從褲子掏出手機

△ 手機上是他們三人 cosplay 的相片，他們扮演星球大戰的角色

△ 黃天生搶過來看

黃天生： (驚喜) 喂，點解你有既？

林家富： 我最近過晒落手機喇，呢 d 咁經典既回憶緊係要 backup 啦

黃天生： 呢張正呀，好彩果時有阿龍幫我地整衫，我地先有得出去威

林家富： 阿龍 d 手工不鏽都好，如果淨係靠我地兩個 engine 佬，邊整到咁多靚衫

黃天生： 你睇呢張...

△ 相上黃天生與林家富裝扮成星戰中的角色 R2D2 及 C3PO，服裝卻十分粗糙，用紙皮製作

第二十七場 (回憶)

時：日

地：學界 cosplay 大賽會場

人：林家富、黃天生、司儀、乙選手兩名

△ 會場內眾多參賽者 cosplay 成各類的動漫人物

△ 司儀站在台上

司儀： 歡迎各位俊男美女參加第十一屆既學界 cosplay 大賽

△ 黃天生與林家富裝扮成星戰中的角色 R2D2 及 C3PO，服裝卻十分粗糙，用紙皮製作

林家富： 第一次參加咁大型既比賽，有 d 緊張

黃天生： 定 d 黎，千其唔好怯，一怯你就輸

林家富： 我今日呢身打扮散唔散鏡？

黃天生： 何止散鏡，簡直係全場焦點啦，話晒整呢兩套野都整左成個月

△ 沿路途人也以鄙視的目光看著他們，有些甚至報以恥笑

林家富： 唔係講笑啫，真係全場既人都望住我地兩個

黃天生： 咁搞法，我地兩個分分鐘擺獎添

△ 會場另一邊有一對同樣打扮 r2d2 與 c3po 的選手走過，打扮卻十分專業

選手 1： 呢兩個紙皮人係邊走入黎？

選手 2： 可能係街邊露宿之後盪失路掛

△ 兩人經過林家富和黃天生，恥笑他們

黃天生： (不忿) 你兩個講咩呀？

選手 1： 我話呀，你地兩個紙皮人快 d 返屋企啦，套衫整到咁都仲想出黎獻世

△ 人聽到大笑

林家富： (垂頭喪氣) 天生，不如都係返去啦

第二十八場 (回憶)

時：日

地：大學宿舍

人：林家富、黃天生、龍卓驥

△ 二人穿著 cosplay 服回到宿舍

△ 一路上的途人恥笑他們

黃天生： 行快兩步啦

△ 黃天生沒向前看，撞到一個途人，正是龍卓驥

△ 龍卓驥目不轉睛地望著黃天生與林家富

黃天生： 望咩姐？未見過人玩 cosplay？

△ 黃天生與林家富急步回到房間

△ 兩人失落地坐在一角

林家富： 不如都係放棄啦

黃天生： 都係嘅，都係睇人玩好過自己玩

林家富： 出到去又盡畀人笑

△ 黃天生把身上的紙皮 cosplay 一手撕爛

△ 有人拍門，黃天生去開門，是龍卓驥

黃天生： 係你？做咩呀？笑唔夠呀？

龍卓驥： 有冇興趣一齊玩 cosplay？

黃天生： 吓？

龍卓驥： 我話有冇興趣一齊玩 cosplay？

第二十九場（接二十六場）

時：晚

地：龍卓驥家

人：林家富、黃天生

△ 相上林家富、黃天生穿上一套十分精巧的 COSPLAY 服，同樣是 R 2 D 2 與 C 3 P 0

林家富： 你睇，阿龍 D 手工幾好，同我地套紙皮衫冇得比

黃天生： 佢設計不嬲都好，唔做 D E S I G N E R 真係晒左

林家富： 唉，如果唔係發生 D 咁嘅事，我諗今時今日既阿龍一定好唔同

黃天生： 做得兄弟，見佢搞成咁，又點會好過，所以佢想點，我從來都撐佢，呢綜援咪呢綜援囉

林家富： 但今次真係過左火，咁落去，阿龍真係會出事

△ 二人失望地搖頭

第二十八場（回憶）

時：日

地：公司辦公室

人：龍卓驥、上司 A、男子 A

△ 龍充滿自信的步入公司

△ 老闆拿着他的設計圖，說了幾句

龍： 下，咁改完之後咪同今季 BV 個 spring collection 好似？

上司 A： 唏，你講開岩喇，你跟住 BV 改少少就得喇。你設計到咁好咁特別 D 客都唔會理嫁啦，佢地識鬼睇咩！你設計 D 似大牌嘅設計，我地再以平價賣出去，有得做呀！

△ 龍卓驥震驚更大怒

龍： 咁你唔洗請設計師啦，你叫你個女抄低 D 圖再用小畫家加兩筆咪得囉！仲唔洗成本添！

△ 龍卓驥收拾座位的私人物品離開

△ 龍卓驥與一男子 A 握手，然後剪綵，牆上面寫著開張大吉

△ 龍與男子 A 在工作室

龍： 今季嘅設計我淨係比過你睇，宜家你偷我設計仲拎埋獎？！

男子 A： 喂阿哥！利益行先，人不為己天殊地滅呀！係你豬姐！設計未 launch 就比其他睇

△ 龍頹廢，常到酒吧喝酒

第二十九場（接二十七場）

時：晚

地：龍卓驥家

人：黃天生、林家富

黃： 唉，其實阿龍真係幾有才華，佢宜家咁真係好晒

林： 佢再咁頹落去真係唔掂喎，不如...我地推佢把...

黃： 話推就推咁易咩？仲難過推佢去死呀！不過我都覺得要幫幫佢喇

林： （想到點子狀）呀！你記唔記得...

第三十場

時：日

地：社署

人：龍卓驥

△ 龍站在社署門外，露出迷茫的表情

△ 過了數秒，他走進社署

第三十一場

時：日

地：機場

人：Mary、龍卓驥

△ Mary 與龍在機場某咖啡店喝飲品

△ Mary 看看手錶

Mary： 呀，都差唔多夠鐘喇

龍： 下？咁快？哦，我送埋你入去呀

Mary： 唔洗啦！我又唔係第一次飛！

龍： 差兩步路姐，咪當比我做下運動囉

Mary： 哈哈，好啦

△ 龍與 Mary 走至離港閘口前

Mary： 再送你真係跟埋我入去喇

△ 龍笑

Mary： 多謝你呢幾日陪我週圍去呀，我返到 LA 完成本影集之後，第一時間寄本比你

△ 龍露出依依不捨的表情

△ Mary 欲言又止

龍： 好呀！嗯·Mary 呀·其實...

Mary： (打岔) 阿龍呀·其實呢·我今次返香港除左想影舊區之外·仲有一個原因嫁·就係想見下你

△ 龍一怔·內心極歡喜

Mary： 但係·呢次見到你我有 D 失望

龍： (震驚) 下?! 點解呀?!

Mary： 嗯...我覺得你同大學嗰時好唔同·好似無左團火咁

△ 龍想回應·卻想不到可以說甚麼

△ 二人沈默

Mary： 我走喇·飛機唔等人·希望下次返黎·會見返我當初識嗰個龍卓驥啦。(勉強一笑) 不過點都好·好開心今次見返你

△ Mary 說畢·頭也不回往離境大堂走

△ 龍看着 Mary 背影·神情憂傷

第三十二場

時：夜

地：龍卓驥家

人：龍卓驥家

△ 龍回家，發現桌上有一疊陳舊的設計書

△ 龍感上前翻了兩頁便置之不理，然後離開家

第三十三場

時：夜

地：唐樓天台

人：龍卓驥、布永存

△ 龍上天台，卻見布永存也在天台

布： 依？乜咁岩呀

龍： 嘩，你呢句開場白同 D 女講就得

△ 龍走至布旁，看到布在喝啤酒

龍： 做咩呀，一個人喺度飲悶酒，有心事呀？

布： (笑) 唔係有心事點會一個人上天台呀？

龍： 唏，我就淨係記得我對上一次上黎遇着你呢個痴線佬

△ 布笑着把一罐啤酒遞給龍

布： 今次唔痴線喇，陪我飲啦

龍： 拿，我平時唔係咁隨便嘅，見係你咋

△ 兩人看着深水埗繁忙的街道喝着啤酒

龍： （嘆氣）你唔講唔覺，原來香港真係變左好多，我仲記得細個個維港無宜家咁窄，呢度嘅樓都無宜家咁高，個陣時個天好似比宜家闊好多

布： 係呀，就好似嘅樓咁，拆下一幢，啜一聲個度又起返幢新

龍： 我睇宜家香港嘅新樓下下都整到豪宅咁，又用晒西式建築，個名仲要有咁難讀得咁難讀。仲有之前呀，明明香港有本土風味嘅小販政府唔發牌，但就引入咩歐陸美食車

布： 係囉，其實咪姐係外國小販

龍： （沒理會布）仲聽話要將呢度搞到南韓東大門咁，明明呢度就已經有你個布檔嘅喇！真係痴線！

布： 無計啦，啲人覺得外國野馨香嘅嘛

龍： 唔係話同你吹到下水先咁講，我係政府就真係情願比牌你喇！我真係唔明，乜本土特色唔好咩？係要跟人地

布： 牌主唔想做就比迫個牌拎錢，我地呢啲想做就無牌唔做得

龍： 車，講到尾又係錢

△ 龍若有所思

布： 唉，雖然唔想咁講，以前就得姐，但宜家香港地無錢點生存呀，邊度仲會睇我地人情味呢啲野，下下都經濟行先，嫌錢腥咩

龍： (悄悄回過神) 嗯... 係... 係囉！香港無錢點生存到...！

第三十四場 (回憶)

時：日

地：辦工桌

人：龍卓驥、上司 B

△ 龍在辦工桌埋頭苦幹，

△ 上司 B 前來，將設計圖遞給龍

上司 B： 阿龍呀，你呢條裙係特別，但佢太複雜、太仔細喇，你 cut 走層花...

龍： 但係呢個設計係要有花先帶出到個種熱鬧氣息啲

上司 B： ... 成本高嘛！係呀仲有呢度唔用摺啦，太花功夫

龍： 但你睇返香港啲女仔普遍身形比較直，呢種輕微修身嘅 cutting 會比較受歡迎。宜家無層次連修身都無，咁不如叫佢地直接粒住個麻布袋出街，第時你見到成街麻布袋咁行...

上司 B： 阿龍！你唔好成日剩係畫啲比本土市場嘅設計啦！大陸十幾億人，外國十億人，要學識放大眼光，迎合下客人嘅口味！啲外國客鐘意嗰種東方美

係保守中帶有性感，你用麻布都得，但你要將旗袍設計得再性感啲，可能露下背同裙叉再開大啲...

△ 龍一面不忿

上司 B： ... 同埋呀，改返做長袖啦，新年係最多人買，但你設計嗰啲下下都係短中袖，人地點會買呀！唔係啱，旗袍啲料都唔可以係麻布，唔岩冬天，你改做...

龍： 呀老闆，首先我完全睇唔出你邊度有保守啦，你要嗰種性感點解唔一早叫我設計情趣內衣

上司 B： 你講咩話？

龍： 仲有，如果你要嘅係旗袍就唔可能係長袖，佢地要長袖就叫佢地去買棉衲

第三十五場（連第三十三場）

時：夜

地：唐樓天台

人：龍卓驥、布永存

布： 無啦，時代會變，好多舊嘅野都比人淘汰喇，唉，睇怕布檔同我呢啲老野都好快被人淘汰喇（未幾）不如趁棚仔拆之前，你黎幫下手，當探下我地啲老野嘛

龍： 嘩，咁你咪好著數？有我呢個又型又英嘅幫手，容乜易我比啲妹妹阿姨圍，你當我傻

第三十六場

時：日

地：深水埗布販市場

人：龍卓驥、布永存、陳伯、客人 A、檔主 A

△ 龍與布到棚仔，龍看到有檔主睡着了

龍：（打着呵欠，拍布）你睇

△ 客人輕輕叫醒其檔主

客人 A：唔好意思呀...

△ 檔主 A 睡眼惺忪看着客人

客人 A：我想問下呢塊布點賣...？

△ 鏡頭轉回布與龍

△ 兩人往檔口走着

布：（笑）係呀，呢度做野好自由嫁...

龍：我係叫你睇下，連阿伯都頂唔順訓着左喇，你竟然叫個後生晨早流流起身同你開鋪，你有冇人性嫁

布：唏，早睡早起身體好！

龍：咁都要我真係早睡先得嫁！我無你身體咁好呀布佬，我琴晚睇完波成四點先訓，今朝九點都未到就比你痴左線咁攞門鐘

△ 龍與布到檔口

△ 此時，陳伯上前

陳伯： 依阿布，你個仔呀？

布： (笑) 早晨呀陳伯！唔係啦，我個仔邊度會跟我黎棚仔

陳伯： 哦... (跟龍說) 後生仔...

△ 龍一驚，心想阿叔又要說長篇

陳伯： 阿叔今年都 83 歲喇！入黎呢個棚仔都差唔多四十年，可以講得上係深水埗嘅地膽，兼夾呢個疋頭業嘅最老行尊...

布： 係呀，陳伯好堅嫁

△ 龍假笑，望陳伯早點說完

陳伯： (繼續) 你唔好睇棚仔好似污糟邈邇呀，如果實際要揀呀，都有好的上乘嘅布嫁...

龍： 阿伯，我地要開鋪喇阿伯

陳伯： 因為我地係賣士多 (Stock) 布，所以價錢平又可以散剪，好多特別嘅布都可以搵到嫁

△ 龍把布輕輕拉到一邊

龍： 喂，其實布檔啲阿叔係咁好鍾意係咁同人講自己啲野

布： 哦，陳伯佢耳仔有啲撞聾，唔係好聽到你講野嫁

△ 陳伯又拉回龍

陳伯： 當年阿叔我呀，張家輝個老豆呀，同埋我一齊喺汝洲街開排檔嫁，你唔知道嫁咋，哼，張家輝個老豆呀

龍： 阿伯，張家輝個老豆宜家都唔洗做喇啲

△ 陳伯一怔，裝聽不到

陳伯： 舊時我地用算盤計數...

△ 龍走回布旁

龍： 喂！佢擺明聽到我講野扮聽唔到啲！

布： 唔係，陳伯耳仔真係聽唔到

陳伯： 呢個算盤都跟左我 50 年喇

△ 陳伯打起算盤

陳伯： 三一三淨一，三一三淨一，er... 逢三進一，逢... 逢六進二（看一看龍與布）er... 三二...

△ 龍與布看着陳伯

陳伯： er...逢六進二，三...三...

布： 呀！陳伯，你有客呀！

陳伯： 唏，後生仔，遲啲再教你

△ 陳伯離開

△ (碎鏡) 布向龍介紹不同的布

布： 拿，同岩先嗰種唔同，呢隻叫莨綢，靚野黎嫁，一代宗師都係用過佢黎嫁！佢係蠶絲用人手織嘅，宜家呢用人手織織嘅布呢已經無嫁喇，絕種嫁喇

△ 龍拿起莨綢，手溫柔的摸着

龍： 莨綢...

△ 布看着他的背影，若有所思

第三十七場

時：夜

地：深水涉布販市場

人：龍卓驥、布永存、阿占、Pierre

△ 龍與布二人開檔至晚上

△ 布動一動肩

龍： 做咩呀？劫喇？

布： 少少啦，琴晚訓得唔太好

龍： 唏，你返去先啦，檔口啲手尾我搞喇

布： 唔洗啦...

龍： 得啦，我又唔係第一日黎幫手

△ 龍推走布

△ 布半推半就

布： 好啦咁，麻煩晒你喇下

龍： 走啦你

△ 市場內的人廖廖可數

△ 龍收拾布檔然後關店

△ 有兩個可疑人物經過

△ 龍看到，暗中留意着

第三十八場

時：夜

地：街道

人：阿占、Pierre

△ 阿占在電話亭打電話給大佬，神情閃縮

阿占： 喂，係，大佬，我到左。係，好

△ 阿占放下電話聽筒

阿占： 大佬話啲架生（工具）喺公廁

第三十九場

時：夜

地：公廁

△ 兩人進了公廁，找過每格的水箱找不到架生

△ 阿占拿出 IPHONE 致電大佬

△ Pierre 看到 IPHONE 一面疑惑

Pierre： 依，呢個...（指着 Iphone）

阿占： Iphone, 最新 model, 6S

Pierre： 咁你頭先又用電話亭...

阿占： 我睇啲戲，幫親大佬做野嘅人都用電話亭，咁樣先夠型

△ 電話接通

阿占： 係，大佬又係我，我地搵晒貴林街公廁啲水箱都搵唔到刀

大佬： 乜鬼野刀呀，搞個布檔都要刀，你係咪睇戲睇上腦呀

阿占： 下？（驚後馬上裝回冷酷）咳... 咁啲架生係

大佬： 喺尾格呀，兩桶喺晒度

△ 阿占示意 Pierre

△ Pierre 到尾格，手指着大膠桶，用表情問

△ 阿占示意叫他開

Pierre： (大叫) 嘩！好臭呀！

大佬： 屎就緊係臭啦！

阿占： 屎？！

大佬： 你地今晚快快脆脆搞掂呀！係咁啦！

△ 大佬掛掉電話

△ 二人在公廁內面面相覷

阿占： 喂，Pierre 快啲蓋返個蓋啦，好臭呀

△ Pierre 捏着鼻，雞手鴨腳蓋上

Pierre： 呢度離布檔咁遠，點搬呀！

△ 阿占想辦法狀

第三十九場 (接第三十七場)

時：夜

地：深水埗布販市場

人：龍卓驥、阿占、Pierre、陳伯、其他檔主二人

△ Pierre 與阿占用布塞鼻

△ 二人一前一後搬

△ 桶上的蓋虛掩，搖搖欲墜

阿占： Pierre 行快啲啦！

Pierre： 唔好推啦！等間倒晒落我度喇！

阿占： 襯宜家人少少搞掂佢

△ 龍見兩人形跡可疑，於是上前看個究竟

△ 兩人共同搬着一個大膠桶，走近另一個檔口，打算倒

△ 龍跑去

龍： (大喝) 喂！你地做乜野呀！

△ 兩人吃了一驚，把桶倒向龍，然後就跑

△ 其他檔主聞聲而至後掩鼻

△ 龍滿身糞便

陳伯： (捏鼻) 阿龍，你好玩唔玩屎？！

龍： 玩？你玩埋我嗰份啦！

檔主 A： (捏鼻) 龍仔，因乜解究你搞成咁呀

△ 檔主 B 拿毛巾給龍後，又彈遠遠

龍： 頭先有兩個人蒙住個鼻搬住一大桶屎諗住淋三孀個檔口呀，我咪喝住佢囉！

陳伯： (捏鼻) 睇黎係有人想出陰濕招迫我地搬走啦！

檔主 B： (捏鼻) 阿龍，你份人真係見義勇為喇！

龍： 嗯... (抹面) 嘩好臭眼呀，唔得喇，我都係返去沖涼喇，陳伯你幫我收鋪呀

陳伯： (捏鼻) no problem 啦！你快啲去，好臭

第四十場

時：夜

地：龍卓驥家

人：龍卓驥，林家富，黃天生

△ 林家富、黃天生與龍卓驥在家中看球賽，林家富與黃天生坐到十分遠，不想接近龍

龍： 你班友呀，洗吾洗咁誇張呀！我都沖左十幾次涼啦！仲臭咩？

黃： 我硬係形住你有陣屎徐，係咪你本身臭呀

△ 黃、林笑

龍： 係呀！等間我就拎你地啲衫黎著

林： 不過話時話阿龍，做咩你今次咁英勇，平時唔係第一個走先嫁咩？

龍： 咁人地叫我幫佢睇鋪嘛

黃： 間鋪又唔係你嘅，咁緊張做乜

龍： (一怔) ...唏！咁萬一佢地啲貨有事，之後入我數要我賠咁我咪蝕？！

△ 林與黃相看，笑而不語

△ 球賽中場休息

龍： 中場，落去買野飲先

黃： 喂，我同你一齊去啦，我都想買啲野食

第四十一場 (接第四十場)

時：夜

地：龍卓驥家大廈

人：龍卓驥，黃天生，警察 A，警察 B

△ 龍與黃拿着數袋飲品及零食坐升降機，升降機內同時有兩名警察

△ 龍與黃對看，面上帶有不安神色

△ 黃用眼神示意龍

黃： (OS) 搞乜野夜媽媽有兩條差佬嘅？

△ 龍向黃露出滿帶疑惑又不安的表情

龍： (OS) 你問我我鬼知咩！

△ 黃皺眉

黃： (OS) 會唔會係因為你呃綜援單野...?

- △ 龍睜大雙眼
- △ 兩個警察轉身望向兩人
- △ 兩人裝沒事
- △ 警察回頭
- △ 龍睜大眼

龍： (OS) 唔會呀嘛，要拉都唔係深夜啦，而且社署五天工作週嫁嘛，公務員邊有咁勤力呀

△ 黃憂心

黃： (OS) 但同一層喎，可能係突擊，就好似掃黃咁一下捉住痛腳

- △ 升降機開門
- △ 四人步出，走向同方向
- △ 龍與黃步步驚心
- △ 警察經過龍家沒停下，走向陳凱光家門按鈴

第四十二場 (接第四十一場)

時：夜

地：龍卓驥家

人：龍卓驥，林家富，黃天生

△ 龍與黃二人快速開家門及關門

林： 嘩，做乜咁騰雞呀？！

△ 二人無理會，龍在看防盜眼，黃耳朵貼着門

第四十三場（接第四十二場）

時：夜

地：龍卓驥家外走廊

人：龍卓驥，林家富，黃天生，陳凱光

陳： Sorry Sir Sorry Sir

△ 警察離開

△ 龍打開大門

龍： 咩事呀？咁多警察既

陳： 我岩岩都想搵你！你自己做過乜你最清楚啦！

龍： 下？我做過好多野嘞，岩岩睇左場波上半場仲落街買埋宵夜

陳： 我比人投訴有噪音呀，唔係你玩野仲有邊個呀！

龍： 我就唔搞呢啲小動作嘅，但你咁易躁底，得罪人多，稱呼人少呀

陳： （更生氣）呀！你仲...

龍： 拿，你唔洗咁躁先，等間又比人投訴嫁喇，場波就開喇，返去睇波啦，今日 wifi 係咪順好多呢

陳： 梗係啦！我 set 晒密碼你想偷都偷唔到啦

龍： 雖然係 set 左了密碼，但你用 WEP 連我個外行都 hack 到啦

△ 陳凱光正想發難

龍： 唏，不過我最近就裝左光纖，睇波高清到好似現場睇咁呀！你有興趣都可以同我合供嫁，加埋你個穿牆式 wifi router 可謂天下無敵，每月只需比返 216 蚊我...

陳： 我彩你都費事呀！

△ 陳凱光逐關門前

△ 龍對門大叫

龍： 記得 wifi 密碼用 WPA 或者 WPA2 呀，無咁易比人 hack 嫁！

陳： (喃喃自語) 唔怪之得今晚睇波咁順啦。條友轉死性呀

第四十四場

時：日

地：深水埗布販市場

人：龍卓驥、布永存、學生 A、學生 B

△ 龍與布在棚仔，布在吃午飯

△ 兩名學生走至布的檔口

學生 A： 老闆，唔好意思呀，想請問呢度有冇亞麻布

△ 布甫要回應之際，龍阻止

龍： 你食飯啦，等我黎。有亞麻布，想要咩色？

△ 兩名學生討論

學生 B： 想要米白色，半碼

龍： 無問題。係啲，你地諗住整咩？

學生 A： 我諗住整個袋交功課呀，佢就想 re-decorate 對鞋

龍： 哦，姐係布袋嗰 d，但就咁會唔會太 common 呀。其實亞麻布都有好多唔同嘅紋路同顏色，拎唔同嘅做拼貼都唔錯嫁

學生 B： 但我地無咁多錢買布...

龍： 其實我地有啲布版，都可以賣比你，細塊啲，又平啲...

△ 布在旁看，欣慰的笑

△ 龍在介紹不同布

學生 A： 今日好多謝你呀，教左我地咁多野。我地岩岩先學 design 呢啲，都唔係太識

龍： 哦，正常嘅，我嗰時 poly 岩岩入 design 都唔知做乜咁嫁。

學生 A： 我地都係 poly 嫁！

龍： (笑) 呢度應該係 poly design 學生嘅聖地

學生 B： 係呀！不過呢度要拆，批發商又要大量買，遲啲都唔知可以去邊度買到布

△ 眾人靜默一會

龍： 你地趁未拆黎多啲囉！係喇，見你地新學造袋，剪多少少比你地喇

學生 A、B： 嘩！多謝你呀！

第四十五場

時：日

地：龍卓驥家

人：龍卓驥

△ 龍用心的拿着筆，又拿剪刀在剪東西，卻不知在做甚麼。

第四十六場

時：日

地：街道

人：龍卓驥、阿姨

△ 龍拿着包裹，途中碰到那一開始被他撞出升降機外的阿姨

△ 阿姨怒目

龍： 拿阿姨，收埋你啲怒氣先

△ 龍遞她一個蘋果

龍： 見你咁好火，請你食蘋果，蘋果唔止下火，更可以中和體內過多嘅酸性物質，緩解疲乏症狀，氣味都有助抗抑鬱同失眠

△ 阿姨態度軟化

龍： 最適合你呢啲更年期婦女服用

阿姨： 睬過你咩！我仲係黃花閨女黎嫁！

第四十七場

時：日

地：龍卓驥家

人：林家富、黃天生、龍卓驥

△ 林家富與黃天生出升降機

林： 唉，唔知嗰啲陳年設計書有無用呢

△ 黃天生煩惱狀

△ 二人打開家門

△ 龍在積極地畫設計圖

△ 兩人呆掉

林： 阿龍，你做緊咩呀？

龍： 我預備緊 portfolio 去見新工呀

△ 黃與林對看相笑

△ 黃上前摸龍的額頭

黃： 你發燒呀？

△ 龍撥開黃的手

龍： 咪搞我啦，我差少少搞掂喇

△ 林把黃拉到一旁

林： (輕聲) 睇黎啲設計書真係得嗰，之前仲怕佢見到唔開心

黃： (輕聲) 係囉，早知一早拎出黎啦

△ 龍拿出設計書

龍： 你地啲啲設計書清朝年代咁耐冇鬼用咩，最過份係夾左天生本夕樹舞子寫真集入去，大佬，鼓勵都比啲誠意，買啲新少少嫁

△ 黃取回寫真集

黃： 咩呀，嗰本正野黎嫁！

△ 龍搶走寫真

龍： 正野我就拎左佢喇

△ 黃試取回

黃： 咁又唔好

△ 龍緊握書

龍： 點都好，多謝你地

第四十八場

時：日

地：設計公司

人：龍卓驥、面試人員 A

△ (Montage) 面試人員問了一連串問題

△ (Montage) 龍卓驥回答，表情認真而自信

面試員： 的確你嘅專業知識都幾符合我地要求，只不過有最後一個問題

龍： 係

面試員： 我見到你近呢幾年個履歷係空白，咁想問返係咩情況...

△ 龍想了數秒，深吸一口氣

龍： 係，我呢幾年的確無工作，靠領綜緩過生活

第四十九場

時：夜

地：龍卓驥家

人：黃天生、林家富、龍卓驥

△ 龍回家

黃： 喂，點呀見工見成

林： 係囉，得唔得呀

△ 龍會心微笑

△ 黃與林上前拍他肩膀

林： 咁要賀一賀佢喇！

黃： 阿龍終於有工做，可以叫佢請食飯喇！你條友成日食我地，我地今次仲唔食返夠本？！

龍： 你地冷靜啲先，收返埋啲口水。我呢，面試係失敗左嘅

△ 黃與林驚訝

龍： 佢話我過去幾年都係拎綜援，少左好多經驗，未必知道宜家市場係點，而且因為綜援，對於我工作能力都有啲質疑

林： 佢咁講真係仲 hurt 過叫你返去等電話啲

黃： 下，你同佢講你之前拎綜援？！你是但講去外國流浪呢啲型的嘅答案都好啲呀！

△ 龍依舊微笑著，聳聳肩

黃： 你失敗左都仲咁開心？

林： 睇黎阿龍解開左個心結喇啲

△ 黃一怔，恍然大悟

黃： 車！

△ 三人滿足的笑

第五十場

時：日

地：火車站外便利店

人：龍卓驥、路人

△ 龍卓驥在便利店買飲料

△ 旁邊路人把手機放在一旁，然後打開冰箱取飲料

△ 手機留了便利店

△ 畫面打出：法則四 著數擺盡 道德其次

△ 龍他隨即把畫面上的法則撥走

△ 龍輕輕一笑龍拾起手機

龍： 先生先生，你部手機呀

路人： 哦，唔該

第五十一場（接五十場）

地：火車站

人：龍卓驥、李阮阮

△ 龍進入火車站

△ 背後有人拍他肩膀，是李阮阮

李： 龍先生

龍： 李姑娘？好耐冇見

李： 係呀，咁就兩年，你而家幾好嘛？

龍： 而家做返老本行，搞 design，預備緊搞新公司，叫做有自己 brand 咁

李： 吓？咁犀利？

龍： 哈哈，十劃都未有一撇

李： 見到你咁就好喇，你係我畢業之後處理既第一個 case，所以我果陣都好比心機跟，見到你重新振作，實在太過感動

龍： (尷尬) 哈哈..

△ 這時頭頂有一架飛機經過，兩人看著它

第五十二場

時：日

地：機場

人：Mary

△ 飛機從天空降落

△ Mary 戴著墨鏡，拖著行李步出入境大堂

第五十三場

地：展覽廳

人：龍卓驥、Mary、Mary 友人、觀眾群

△ 龍身穿自家品牌，他手上拿著攝展展的請柬

△ 他進到一攝影展，展覽門外貼著主題鄉愁

△ 龍一直遊覽，展覽有着不同國家充滿歷史及本土特色的相片

△ 有人拍龍的肩膊

Mary： 阿龍

龍： 喂，好耐冇見

Mary： 你最近點呀？

龍： 哦冇，搞緊自己品牌，我身上呢件都係自己 design

△ Mary 眼前一亮

Mary： 唔怪得咁特別

龍： 你呢套旗袍...

△ 旗袍背面是露背

Mary： 靚唔靚呀？我有日喺 LA 行過 D 細鋪，見到間特色野係賣傳統中國衫買，呢條裙我第一眼見到就鍾意

△ 龍勉強一笑

Mary： 點呀，我個影展 ok 嘛？

龍： 當然 ok 啦，有大師級風範

Mary： 哈，過獎，你睇下果邊，係兩年前我返黎香港果陣同你一齊影

龍： 我岩岩都見到。係喇，你今次會留係香港幾耐

Mary： 我今晚夜機就走，要去一轉西雅圖做野

龍： 哦...

△ 遠方有人叫 Mary

Mary： 喂一陣再同你傾，我要過一過去果邊先

△ Mary 回頭就走，忽然又停下轉身

Mary： 我就知你會變返以前嘅阿龍，咁先至係你嘛

△ 龍會心一笑，Mary 離去

△ 龍看着 Mary，Mary 與別人談笑風生，他再看看 Mary 的作品，不久便獨自離去

第五十四場

地：深水埗西九龍中心對面

人：阿叔A

- △ 事拍着街邊電器舖的電視，旁邊是西九龍中心
- △ 一個阿叔經過，停在電視前看
- △ CCTVB 新聞畫面內映着棚仔清拆的情境

主播： 欽州街布販市場，俗稱棚仔，經營超過四十年，今日終於面臨清拆。棚仔一直係香港其中一個賣布嘅集中地，該處布匹以廉價物美為著名。就今次清拆，好多當地市民都有反對意見，而到清拆嘅今日，現場有好多市民圍觀...

第五十五場

地：深水埗布販市場對面

人：布永存、龍卓驥

- △ 棚子的頂被吊臂拉開
- △ 支撐天幕的鐵支被扔到旁邊
- △ 支持棚仔的橫額被吊臂拉掉
- △ 不同橫額如垃圾散落一地
- △ 布永存與龍平靜的在現場觀看棚仔的清拆良久

龍： 你之後有乜打算？

布： 無嫁，又或者我同棚仔一樣，都係時候退落黎喇

- △ 棚仔繼續清拆